

**Siunnersuut uunga: Illulioriternernut aningaasalersuineq pillugu Inatsisartut peqqusutaata allangortinneqarneranik Inatsisartut peqqussutaat nr. xx, uu.qq 2007-imeersoq**

(Sanaartornermi aningaasartuutit tamarmiusut 40 procentii tikillugit pisortanit taarsigassarsiarititat tamaasa Namminersornerullutik Oqartussanit kommuninilluunniit tunniunneqarsinnaanerat, kiisalu illunik nukissamik atuinikitsunik aammalu nukissamik sipaarniarluni iliuseqar-nissamut il.il. taarsigassarsititsinissamut periarfissat)

**§ 1**

Illulioriternernut aningaasalersuineq pillugu Inatsisartut peqqussutaanni nr. 1-imi 7. maj 2007-imeersumi makkua allangortinneqarput:

**1. § 4 imatut oqaasertalerneqarpoq:**

”§ 4. Inissianut nutaanut aningaasalersuutissatut sanaartukkanut aningaasartuutit tamarmiusut 20 procentii tikillugit Naalakkersuisut kommunalbestyrelsilu tamarmik immikkut taarsigassarsititsinnaapput. Taakku arlaata taarsigassarsiarititassani tunniutinngippagit aappaata sanaartornermut aningaasartuutit tamarmiusut 40 procentii tikillugit tamakkiisumik taarsigassarsititsinnaavoq.

*Imm. 2.* Imm. 1 naapertorlugu taarsigassarsiarititat inissiami inigisap annertussusaanut annerpaamik 110 kvadratmeterimut annertussusilerneqarsinnaapput, tamatumani inissiaq annertunerugaluarpalluunniit.

*Imm. 3.* Imm. 1 naapertorlugu taarsigassarsiarititat imatut ilusilerneqassapput:

1) 65 kvadratmeterinut siullernut sanaartornermut aningaasartuutinit tamakkiisunit annerpaamik kvadratmeterimut 15.500 koruunit taarsigassarsiaritinneqassapput, tamatumani kvadratmeterimut akiusoq annertunerugaluarpalluunniit.

2) 66 kvadratmeterimiit 110 kvadratmeterimut sanaartornermut aningaasartuutinit tamakkiisunit annerpaamik kvadratmeterimut 10.250 koruunit taarsigassarsiaritinneqassapput, tamatumani kvadratmeterimut akiusoq annertunerugaluarpalluunniit.

*Imm. 4.* Inissianut nukissamik atuinikitsunik klasse 1-inik sanaartornermut piumasaqaatinik naammassinniffiusunut imm. 1 naapertorlugu taarsigassarsititsisoqassaaq, imaalillugu:

1) 65 kvadratmeterinut siullernut sanaartornermut aningaasartuutinit, kvadratmeterimut akiusoq annertunerugaluarpalluunniit, kvadratmeterimut annerpaamik 17.000 koruuninik taarsigassarsititsisoqassaaq.

2) 66 kvadratmeteriniit 110 kvadratmeterinut sanaartornermut aningaasartuutinit, kvadratmeterimut akiusoq annertunerugaluarpalluunniit, kvadratmeterimut annerpaamik 11.250 koruuninik taarsigassarsititsisoqassaaq.

*Imm. 5.* Inissianut nukissamik atuinikitsunik klasse 2-inik sanaartornermut piumasaqaatinik naammassinniffiusunut imm. 1 naapertorlugu taarsigassarsititsisoqassaaq, imaalillugu:

1) 65 kvadratmeterinut siullernut sanaartornermut aningaasartuutinit, kvadratmeterimut akiusoq annertunerugaluarpalluunniit, kvadratmeterimut annerpaamik 16.250 koruuninik taarsigassarsititsisoqassaaq.

2) 66 kvadratmeteriniit 110 kvadratmeterinut sanaartornermut aningaasartuutinit, kvadratmeterimut akiusoq annertunerugaluarpalluunniit, kvadratmeterimut annerpaamik 10.750 koruuninik taarsigassarsititsisoqassaaq.

*Imm. 6.* Imm. 1 naapertorlugu aatsaat taarsigassarsisitsisoqarsinnaavoq taarsigassarsisup sanaartornermut aningaasartuutinit tamakkiisunit sinneruttut nammineerluni aningaasalersus-sappagit.”

2. § 7, imatut oqaasertalerneqassaaq:

”§ 7. § 4, imm. 1 naapertorlugu inissiat naammassinerini, aammalu aatsaat atuilernissamut akuersissummik, sanaartornermut naatsorsuutinik inaarutaasumik akuerisaasunik aammalu qularnaveeqqusiussaqaarluni taarsigassarsinermi allagartap uparuaanertaqanngitsumik nalunaarsorneqarsimasup naqissuserneqarsimasullu naqeqqaarneranik, kiisalu sillimmasiissummik takutitsinikkut taarsigassarsiat tunniunneqassapput. Taamaattorli Naalakkersuisut taarsigassarsiarititaat siusinnerpaamik ukiumi taarsigassarsiarititassatut aningaasaliissutit Inatsisartut aningaasanut inatsisaannut ilanngunneqarfiini akilerneqarsinnaapput, kiisalu kommunalbestyrelsip taarsigassarsiarititai siusinnerpaamik ukiumi aningaasaliissutit kommunalbestyrelsip missingersuutaasa akuerineqartut ilanngunneqarfiini akilerneqarsinnaallutik.

*Imm. 2.* Inissiap qularnaveeqqusiunneqarneratigut taarsigassarsiarititassat qularnaveeqquserneqassapput. Taarsigassarsiat inissiaq qularnaveeqqusiullugu sanaartornermut aningaasartuutit tamarmiusut sinnerinut aningaasalersuinissamut taarsigassarsiarititaasut akilereernerini akilerneqartussatut inissinneqassapput, tak. § 4, imm. 4.

*Imm. 3.* Inissiami akiitsut saniatigut inissiap nalinga qularnaveeqqusiullugu taarsigassarsiat § 4, imm. 1 naapertorlugu taarsigassarsiat akilerneqareernerini akilerneqartussatut inissinneqassanngillat. Taamaattorli taarsigassarsiat, inissiap nalinganut qaffaataasumik inissiami aserfallatsaaliuinerup nalinginnaasup saniatigut iluarsaassinermut pitsanngorsaanerimullu, ilanngullugit nukissamik sipaarfiussamik suliaqarnerit aammalu inissiamik alliliinerimut taarsigassarsiat akilerneqareernerini akilerneqartussatut inissinneqassapput. Taarsigassarsiat akilerneqarnissaasa inissinneqarnerini aningaasartuutit uppernarsarneqarsimasut, taamaattorli annerpaamik iluarsaassinert, pitsanngorsaanerit alliliinerillu, ilanngullugit nukissamik sipaarfiussamik iliuuseqarnerit, inissiap nalinganut qaffatsitsisut kisimik tunngavigineqassapput.

*Imm. 4.* § 4, imm. 1 naapertorlugu taarsigassarsiarititat ullormi atuinissamut akuersissuteqarfiusumiit ukiuni 20-ni erniaqartussaannngillat akilersugassaassanatillu, tamatumalu kingorna taarsigassarsiat Nationalbankip erniarititai 3 procentpointimik ilallugit erniaqartinneqarlutik ukiuni 15-ini annertoqqatigiinnik aningaasartaqartillugit akilersorneqassapput.

*Imm. 5.* § 4, imm. 1 naapertorlugu taarsigassarsiat akilersorneqarnissaannut akiligassallu akilerneqartarnissaannut maleruagassanik aalajangersaasinnaapput.”

3. § 8, imatut oqaasertalerneqarpoq:

”§ 8. § 4, imm. 1 naapertorlugu taarsigassarsiarititat, taarsigassarsiat matuma siuliani taaneqartut aaqqissuuteqqinneqarnerini imaluunniit piginnittut nikinneranni akiligassanngortinneqassanngillat.

*Imm. 2.* Taarsigassarsianik matuma siuliani taaneqartunik aaqqissuusseqqinnermi § 4, imm. 1 aamma 4 naapertorlugit Naalakkersuisut kommunalbestyrelsillu taarsigassarsiarititaat, annerpaamik pisinermut akiusup kingulliup § 4, imm. 1 aamma 4 naapertorlugit taarsigassarsiarititaasut annertussusaat ilanngaatilgalugit, annertussusaata 90 procentii tikillugit annertussu-seqartut akilerneqareernerini akilerneqartussatut inissinneqassapput.

*Imm. 3.* Piginnittut nikinneranni § 4, imm. 1 naapertorlugu Naalakkersuisunit kommunalbestyrelsimillu taarsigassarsiarititat, taarsigassarsiat annerpaamik pisinermi akiusup aningaasa-

lersorneqartup 90 procentianik annertussuseqartut, § 4, imm. 1 naapertorlugu taarsigassarsiarititaasut aningaasartaannik ilanngaaserneqarsimasut, akilereernerini akilerneqartussatut inis-sinneqassapput.”

**4. § 9, nr. 1, imatut oqaasertalerneqarpoq:**

”1) Taarsigassarsianut ernialiussat akilersuutillu akilerneqanngippata, aammalu taarsigassarsisimasoq illuummik aalaakkaasumik qularnaveeqqusiussaqaarluni taarsigassarsinermut allagartami ernianik akilersuutinillu akilersuisarnermut maleruagassat naapertorlugit piffissap akiliiffissap qaangiunnerani akiliisimanngippat, tak. qularnaveeqqusiisarneq pillugu Kalaallit Nunaannut inatsit nr. 154, 10. maj 1967-imeersoq, kingusinnerusukkut allannguuteqartinneqartoq.”

**5. § 9, nr. 4, imatut oqaasertalerneqarpoq:**

”4) Taarsigassarsisimasup, inissiani attartortittakkani namminersortunit pigineqartuni ineqarnermut akiliutip aningaasartuutit malillugit annertussusilerneqartarneranut maleruagassanut, tak. inissianik attartortitsisarneq pillugu Inatsisartut peqqussutaat, akerliusunik atugassaqartit-silluni inissiaq attartortippagu.”

**6. § 9, nr. 6-itut ilanngunneqarpoq:**

”6) Taarsigassarsisimasup inissiaq akunnittarfittut attartortippagu, unnuisarfittut attartortip-pagu assigisaatulluunniit atorpagu, tassuuna paasineqassalluni ineqartoq najukkami aalaja-ngersimasumik najugaqartuunngitsoq.”

**7. § 10, imm. 1, imatut oqaasertalerneqarpoq:**

”Imm. 1. Naalackersuisut iluarsaassinernut, pitsanngorsaanernut, tassungalu ilanngullugu nukissamik sipaarfiusussanik suliaqarnermut aammalu inissianik pioreersunik alliliinermut tamatumunnga aningaasartuutit tamarmiusut 40 procentii tikillugit taarsigassarsititsisinnaap-put.”

**8. § 11-mi imm. 2-p kingorna immikkoortoq nutaatut ilanngunneqarpoq:**

”Imm. 3. Suliani nukissamik sipaarfiusuni pineqartut taamaallaat tassaapput, suliat ilaliussaq 1-imi, tamakkiisumik taaneqartut. Suliassanut nukissamik sipaarfiusussanut taarsigassarsiaritit-tat taamaallaat tunniunneqarsinnaapput, suliat illumut tamarmiusumut tunngasutut suliarine-qarpata. Pitsanngorsaanissamut taarsigassarsiarititassat, ilanngussaq 1 naapertorlugu taamaal-laak suliaassanut nukissamik sipaarfiusussanut tunngasuusut inissiap angissusaa apeqqutaatin-nagu inissianut, 2007 sioqqullugu sanaartornissamut akuersissuteqarfiusunut piginnittunut taarsigassarsiaritinneqarsinnaapput.”

**9. § 13, imatut oqaasertalerneqarpoq:**

”§ 13. § 10, imm. 1 naapertorlugu taarsigassarsiarititassat imatut aalajangersaaffigineqassap-put:

1) § 11, imm. 3 naapertorlugu suliaassanut, nukissamik sipaarniarnermut tunngasuunngitsunut tamanut taarsigassarsiarititaasut annerpaamik 283.500 koruuninik amerlassuseqarsinnaapput.

2) § 11, imm. 3 naapertorlugu suliaassanut taamaallaat nukissamik sipaarniarfiusunut tunngas-uteqartunut taarsigassarsiarititassat annerpaamik ilanngussaq 1-imi suliaassanut ataasiakkaa-nut allassimasut aningaasartaasa annertoqataannik amerlassuseqassapput. Taarsigassarsiat annerpaamik 140.000 koruuninik amerlassuseqarsinnaapput.

3) Nr. 1 aamma 2 naapertorlugit taarsigassarsiarititat annerpaaffissaat suliassanut, § 11, imm. 3 naapertorlugu nukissamik sipaarniarfiusunut aamma § 10, imm. 1 naapertorlugu suliassanut allanut ilanngunneqarsinnaapput.

*Imm. 2.* Taarsigassarsisup nammineerluni iluarsaassinernut, pitsanngorsaanernut, tassungalu ilanngullugu suliassanut nukissamik sipaarniarfiusunut aammalu alliliinernut aningaasartuutit aningaasalersorsinnaappagit, § 10, imm. 1 naapertorlugu taarsigassarsiarititat taamaallaat tunniunneqarsinnaapput.

*Imm. 3.* § 10, imm. 1 naapertorlugu taarsigassarsiarititat inissiaq qularnaveeqqusiullugu taarsigassarsiatut erniaqanngitsutut akilersugassaangitsutullu tunniunneqassapput. Taarsigassarsiat inissiaq qularnaveeqqusiullugu taarsigassarsiaasimasinnaasut allat akilerneqareernerini akilerneqartussatut inissinneqassapput. Aatsaat inissiamut inissiaq qularnaveeqqusiullugu taarsigassarsiat tamakkiisut inissiap niuernermi nalingata 90 procentia sinnerlugu amerlassuseqanngippata, taarsigassarsiarititat taarsigassarsiat siuliini inissisimasut akilerneqareernerini akilerneqartussatut inissinneqassapput.

*Imm. 4.* Taarsigassarsisup aamma taarsigassarsisup aappaata akornanni piginnittut nikinnet pineqanngippat, imaluunniit taarsigassarsisoq allatut aalajangiisimangippat Naalakkersuisut taarsigassarsiarititaa piginnittut nikinnetanni akiligassanngortinneqassapput.

*Imm. 5.* Inissiamut ataatsimut taarsigassarsiarititat amerlanerpaamik marluusinnaapput, tak. § 10, imm. 1 aamma § 13, imm. 1.”

**10.** § 14, *imm. 1-imi* atorunnaarpoq:

”kiisalu qularnaveeqqusiiffigisap nalunaarutaata naqeqqaarneranik”

**11.** § 15, nr. 5, atorunnaarpoq.

**13.** § 18, *imm. 1*, imatut oqaasertalerneqarpoq:

”*Imm. 1.* Inatsisartut peqqussutaanni matumani § 4, imm. 1 aamma 4, § 10, imm. 1 aamma § 22, imm. 2 naapertorlugit taarsigassarsiarititat 0,5 procentii suliap isumagineqarneranut aningaasartuutininut matusissutissatut akilersinneqassapput.”

## § 2

Inatsisartut peqqussutaat 1. juli 2009 aallarnerfigalugu atuutilerpoq.

*Namminersornerullutik Oqartussat, ulloq xx. xx 2009*

Hans Enoksen

/

Kim Kielsen

## Peqqussutissatut siunnersuummut nassuiaatit

**Nalinginnaasumik nassuiaatit**1. Aallaqqaasiut:

Peqqussutissatut siunnersuut Inatsisartut peqqussutaannut atuuttumut naleqqiulluni aalajangersakkani arlalinni allannguutinik annertuunik imaqarpoq. Allannguutit ilaat, ilaatigut inissianik nutaanik aningaasalersuinissamut taarsigassarsianut aammalu ilaatigut iluarsaassinernut, pitsanngorsaanernut alliliinermullu aningaasalersuinissamut taarsigassarsianut tunngatilugu inatsisitigut inissisimanerup allanngortinneqarnerannik kinguneqassapput, tassani illunik nukissamik sipaarniarfiusunik sanaartornermut aamma inissiani pioreersuni nukissamik sipaarniarfiusunut suliaqarnissamut taarsigassarsisinnaaneq ammaanneqarmat.

Illuliortiternernut aningaasalersuineq pillugu Inatsisartut peqqussutaata nr. 1-ip 7. maj 2007-imeersup atuutilernissaa sioqqullugu inatsisitigut inissisimanerup, tassalu Naalackersuisut kommunalbestyrelsilluunniit, arlaata sanaartornermut aningaasartuutit tamarmiusut 20 procentii tikillugit taarsigassarsiarititassani tunniutinngippagit, inissianut nutaanut aningaasalersuutissatut tamakkiisumik taarsigassarsititsisinnaanerannik periarfissamut tunngasup, atuuteqqilernissaa Naalackersuisut kissaatigaat.

Tamatuma saniatigut oqaasertatigut erseqqissaanissaq siunertaralugu aalajangersakkanik allannguisoqarpoq, kiisalu Inatsisartut peqqussutaanni atuuttumi kukkusumik innersuussisoqarnera iluarsiivigineqarluni.

Taakku saniatigut Naalackersuisut kommunalbestyrelsillu taarsigassarsiarititaasa inissiami akiitsut saniatigut inissiap nalinga qularnaveeqqusiullugu taarsigassarsiat akilereerneranni akilerneqartussatut inissinneqannginnissaat, kiisalu inissiani pioreersuni iluarsaassinernut, pitsanngorsaanernut alliliinermullu Naalackersuisut taarsigassarsiarititaasa illersorneqarnissaat erseqqissarneqarpoq.

Aammattaaq inissianut nutaanut aningaasalersuutissatut taarsigassarsititsisarnermut malittarisassani siunertarineqartup avaqqunneqarsinnaanerata pinngitsoortinnissaa siunertaralugu aalajangersakkami ilanngussisoqarpoq.

2. Peqqussutissatut siunnersuutip pingaarnertut immikkoortui:

Siullermik peqqussutissatut siunnersuummi inissianut nutaanut taarsigassarsititsisarnermut aalajangersakkamik ataatsimik allannguisoqarpoq. Illuliortiternernut aningaasalersuineq pillugu Inatsisartut peqqussutaata atuuttup atuutilernerata siornatigut inatsisitigut inissisimanerup, tassalu Naalackersuisut imaluunniit kommunalbestyrelsi, arlaata sanaartornermut aningaasartuutit tamarmiusut 20 procentii tikillugit taarsigassarsiarititassani tunniutinngippagit, inissianut nutaanut aningaasalersuutissatut 40 procentit tikillugit tamakkiisumik taarsigassarsititsisinnaanerannik periarfissamut tunngasup, atuuteqqilernissaa Naalackersuisut kissaatigaat.

Tamatumunnga tunngavigineqarpoq Naalakkersuisut imaluunniit kommunalbestyrelsip taarsigassarsiarititassaminik taarsigassarsititsisimanginnera pissutigalugu nutaanik illuliortiternermi pitsaasumik ineriartorneq kiisalu illoqarfinnik alliertortitsineq unitsinneqartariaqanngimmata. Allanguuteqartitsinikkut sanaartornerup annertunerusumik ingerlaannarnissaa qulakkeerneqassaaq, tamannalu aammattaaq inuiaqatigiinni pitsaasunik allanik kinguneqartussaalluni.

Kiisalu inissianik nutaanik sanaartornermi illunik nukissamik sipaarniarfiusunik sananissamut taarsigassarsinissamut periarfissiisoqarpoq. Illut nukissamik sipaarniuteqarfiusut assigiinngitsut, illunik nukissamik sipaarniarfiusunik klasse 1-imik aamma 2-mik taaneqartut marluk siunnersuutigineqarput.

Najoqqutassatigut allannguinerit saniatigut § 4-ip oqaasertaliornera, inatsisitigut inissisimane-  
rup allangortinneranik kinguneqanngitsumik, ataasiakkaatigut allanguuteqartinneqarpoq.

Taakku saniatigut aalajangersakkat ilaanni erseqqissaasoqarpoq, taakkunanilu inissianut nutaanut taarsigassarsiat, inissiami akiitsut saniatigut inissiap nalinga qularnaveeqqusiullugu taarsigassarsiat akilereernerini inissinneqassanngitsut, aammalu § 4, imm. 1 naapertorlugu piginnittut nikinneranni Naalakkersuisut kommunalbestyrelsillu taarsigassarsiarititaasa annerpaamik, pisinermut akiusumut aningaasaliissutaasut 90 procentiinik annertussuseqartut akilereerneranni akilerneqartussatut inissinneqassasut aalajangersarneqarpoq

§ 9-mi nr. 4-imi inissianik attartortitsisarneq pillugu Inatsisartut peqqussutaannik innersuussinerup oqaasertaliorneranik allanguisoqarpoq. Maanna tassa erseqqissarneqarsimalerpoq inissiani attartortittakkani namminersortunit pigineqartuni ineqarnermut akiliutip aningaasartuutit malillugit annertussusilerneqartarneranik maleruagassanik, tak. inissianik attartortitsisarneq pillugu Inatsisartut peqqussutaat, unioqqutitsineq, Naalakkersuisut kommunalbestyrelsillu taarsigassarsiarititaasa akiligassanngortinneqarnerannik kinguneqassasoq.

Tamatuma saniatigut Naalakkersuisut kommunalbestyrelsillu inissianut nutaanut aningaasalersuutissatut taarsigassarsiarititaasa akiligassanngortinneqartarnerat pillugu aalajangersagaq ilanngunneqarpoq. Aalajangersakkami erseqqissarneqarpoq inissiat attartortittakkat sananeqarnissaannut Naalakkersuisut kommunalbestyrelsillu aatsaat taarsigassarsititsisinnaasut attartortitsineri akunnittarfik, unnuisarfik allatulluunniit attartortitsineq pineqanngippata. Taamaalluni aalajangersarneqarpoq inissianik attartortitsineri, assersuutigalugu soorlu akunnittarfittut attartortitsineri unnuisarfittut attartortitsineri assigisaannilluunniit attartortitsineri Naalakkersuisut kommunalbestyrelsillu taarsigassarsiarititaat akiligassanngussasut.

§ 10, imm. 1 allanguuteqartinneqarpoq, taassumalu saniatigut § 11-mi immikkoortut nutaanik ataatsimik ilanngussisoqarpoq, tassanilu inissiani pioreersuni suliassanut nukissamik sipaarniarfiusunut taarsigassarsititsisinqarsinnaanera aalajangersarneqarpoq.

Kiisalu § 13 allanguuteqarrinneqarpoq, taamaallunilu suliassanut nukissamik sipaarniuteqarfiusunut taarsigassarsiasat annerpaaffilerneqarput, kiisalu inissiamut taarsigassarsiat tamarmiusut inissiap niuernermi nalingata 90 procentia sinnerlugu annertussuseqanngippata aatsaat § 10, imm. 1 naapertorlugu taarsigassarsiat, taarsigassarsiat matuma siuliani taaneqar-

tut akilereerneranni akilerneqartussatut inissinneqarsinnaasut erseqqissaassutigineqarluni.

Taakku saniatigut § 15-imi aalajangersagaq naapertuutinnngimmat atorunnaarsinneqarpoq.

Naggataagut aalajangersakkat ilaanni assigiissaarinissaq eqqarsaatigalugu iluarsisoqarpoq, taamaalillunilu siunnersuummi allannguutissatut siunnersuutitut naleqqussarneqarlutik.

### 3. Pisortanut aningaasaqarnikkut allaffissornikkullu kingunerisassat:

#### 3.1. Pisortanut aningaasaqarnikkut kingunerisassat

Siunnersuutip atuutilernerata kingunerissavaa taarsigassarsititsisussap aappaa 20 procentit tikillugit taarsigassarsiarititassaminik taarsigassarsititsisinnaanngikkaangat, inissianik nutaanik sanaartornerni aningaasalersuutissatut Naalakkersuisut imaluunniit kommunalbestyrelsi amerlanerusunik taarsigassarsititsisinnaalissammat.

Taamaattumik taarsigassarsiarititassat saniatigut suli 20 procentinik, tassalu katillugit sanaartornermi aningaasartuutitut tamarmiusunit 40 procentinik taarsigassarsititsinissaq, Nunatta Karsiata kommunilluunniit karsiata siornatigorninngarnit annertunerusunik nammagassinneqarsinnaannera naatsorsuutigineqarpoq.

Illunik nukissamik sipaarniarfiusunik sanaartornermut aammalu suliassanut nukissamik sipaarniarfiusunut atatillugu taarsigassarsinissamut periarfissat pisortanut aningaasaqarnikkut annertunerusumik sunniuteqarnissaat naatsorsuutigineqanngilaq, illunut nukissamik sipaarniarfiusunut aamma suliassanut nukissamik sipaarniarfiusunut taarsigassarsiarititassaasinnaasut aningaasaliissutaareersut, Inatsisartut aningaasanut inatsisaanni 10/40/50-imi sanaartornermut oqaasertaliussani taaneqartut atorlugit akilerneqarnissaat naatsorsuutigineqarmat.

#### 3.2. Pisortat allaffissornerannut kingunerisassat

Allaffissorneq eqqarsaatigalugu peqqussutissatut siunnersuut pisortanut annikitsumik allaffissornerulernermik kinguneqarsinnaavoq.

### 4. Inuussutissarsiuteqartunut aningaasaqarnikkut allaffissornikkullu kingunerisassat:

Peqqussutissatut siunnersuut inuussutissarsiuteqartut aningaasaqarneranni allaffissornerannilu allannguutit kinguneqassanngilaq.

### 5. Avatangiisinut pinngortitamullu kingunerisassat:

Peqqussutissatut siunnersuut avatangiisinut pinngortitamullu allanik kinguneqassanngitsutut nalilerneqarpoq.

### 6. Innuttaasunut allaffissornikkut kingunerisassat:

Peqqussutissatut siunnersuut innuttaasunut allaffissornikkut kinguneqarnissaa allannguuteqanngilaq.

### 7. Naalagaaffeqatigiinnermut namminersulernissamullu tunngasut:

Peqqussutissatut siunnersuut Naalagaaffeqatigiinnermut namminersulernissamillu suliap ingerlanneqarneranut kinguneqassanngitsutut nalilerneqarpoq.

### 8. Oqartussaasut kattuffiit allallu tusarniaaviginerat:

Peqqussutissatut siunnersuut Inatsisartut 2007-imi ukiakkut ataatsimiinneranni immikkoortoq 43-tut saqqummiunneqarpoq, tassanilu siullermeerneqarluni. Siunnersuut Inatsisartut Attave-

qaqatigiinnermut Ineqarnermullu Ataatsimiititaliaannit KANUKOKA-mut tusarniaassutigineqartussanngorlugu innersuunneqarpoq.

Inatsisartut 2007-imi upernaakkut ataatsimiinneranni tusagassiuutitigut taamatullu politikkikut aaqqissuussineq atuuttoq kiisalu peqqussutissatut siunnersuut saqqummiunneqartoq oqallisigineqalerput.

Oqallinnerup kingunerisaanik Naalakkersuisut 24. april 2007-imi ataatsimiikkamik aalajangerput, peqqussutissatut siunnersuut saqqummiunneqartoq tunuartillugu peqqussutissatut siunnersuummik iluarsaassiniaarlutik.

Peqqussutissatut siunnersuut iluarsaanneqartoq 9. maj 2007-imiit 20. juni 2007-imut Aningaasaqarnermut Pisortaqaarfimmut, Sulisoqarnermut Pisortaqaarfimmut, Inuussutissarsiornermut Pisortaqaarfimmut, KANUKOKA-mut, Kalaallit Nunaanni Sulisitsisut Peqatigiiffiannut, Ilik-mut, Nusuka-mut, Grønlandsbankenimut, Sparbankimut, SIK-mut aamma A/S Inissiaatileqatigiiffik INI-mut tusarniaassutigineqarpoq.

Tusarniaaneq oqaaseqaateqarnissamut pissutissaqalersitsinngilaq.

Siunnersuut annertuumik allannguuteqarmat, aamma peqqussutissatut siunnersuut 14. december 2007-imiit 28. januar 2008-mut KANUKOKA-mut, Aningaasaqarnermut Pisortaqaarfimmut, SIK-mut, Kalaallit Nunaanni Sulisitsisut Peqatigiiffiannut, Ilik-mut, Nusuka-mut, PIP-mut, IMAK-imut, Grønlandsbankimut, Sparbankimut, AK-mut, ASG-mut, Iserit A/S-imut, A/S Inissiaatileqatigiiffik INI-mut, PPK-mut, Ejendomskontoret Igdlo-mut aamma Grønlands Ejendomskontor-imut tusarniaassutigineqarpoq.

KANUKOKA, Aningaasaqarnermut Pisortaqaarfik, SIK, Kalaallit Nunaanni Sulisitsisut Peqatigiiffiat, Ilik, Nusuka, PIP, IMAK, Grønlandsbanken aamma Qeqertarsuup Kommunia tusarniaanermi akissuteqarput.

Tamatuma kingorna siunnersuut allannguuteqartinneqarpoq, tassunga illunut nukissamik sipaarniarfiusunut suliaassanullu nukissamik sipaarniarfiusunut aalajangersakkanik nutaanik ilanngussisoqarluni, kiisalu aalajangersakkat allat tunngavissamikkut oqaasertamikkullu allannguuteqartinneqarlutik, taamaattumillu siunnersuut dd. Januar 2009-miit dd. Februar 2009-mut tusarniaassutigineqaqqilluni.

Siunnersuut KANUKOKA-mut, SIK-mut, Kalaallit Nunaanni Sulisitsisut Peqatigiiffiannut, Nusuka-mut, A/S Inissiaatileqatigiiffik INI-mut, Iserit A/S-imut, Grønlandsbankenimut, Sparbankimut, Ejendomskontoret Igdlo-mut, Grønlands Ejendomskontor-imut, Naalakkersuisunut Siulittaasup Naalakkersuisoqarfianut, Aningaasaqarnermut Nunanullu Allanut Naalakkersuisoqarfimmut, Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmut, Ilaqutariinnermut Peqqissutsimullu Naalakkersuisoqarfimmut, Inuussutissarsiornermut, Suliffeqarnermut Inuussutissarsiutinullu Ilinniartitaanermut Naalakkersuisoqarfimmut, Aalisarnermut, Piniarnermut Nunalerinermullu Naalakkersuisoqarfimmut, Aatsitassanut Pisortaqaarfimmut, Illuutinut Upalungaarsimanermullu Aqutsisoqarfimmut tusarniaassutigineqarpoq.

Tusarniaaneq makkuninnga pissutissaqalersitsivoq:

## **Peqqussutissat siunnersuummi aalajangersakkanut ataasiakkaanut nassuiaatit**

### *§ 1-imut*

Nr. 1-imut

Aalajangersakkami Inatsisartut peqqussutaanni siornatigut atuuttumi nr. 4-mi 30. oktober 1998-imeersumi kingusinnerusukkut allannguuteqartinneqartumi § 2, imm. 1 aamma 2, kiisalu § 4 ataatsimoortinneqarput aammalu illuliortiternerni aningaasalersuinermik aqqissuussinnermut pingaarnertut piumasagaatinut killiliussanullu nassuiaataalluni. Aammattaaq aalajangersagaq pingaarnertigut illuliortiternernut aningaasalersuineq pillugu Inatsisartut peqqussutaanni atuuttumi nr. 1-imi 7. maj 2007-imeersumi § 4-mik ingerlatitseqqinneruvoq, siunnersuut manna imm. 1-ip malittarisassatigut allannguuteqartinneqanik aammalu imm. 4-imik 5-imillu nutaamik imaqarluni.

Aalajangersakkami allassimavoq inissianut nutaanut aningaasalersuutissatut inissiat annertussusissaat malillugu sanaartornermi aningaasartuutitut tamarmiusunut tapiiffigineqarsinnaasunut 40 procentit tikillugit pisortat taarsigassarsititsisinnaasut. Qinnuteqartup sanaartornermut aningaasartuutit sinneruttut nammineq aningaasalersussavai, soorlu assersuutigalugu aningaaserivimmit taarsigassarsinikkut, realkredittimit taarsigassarsinikkut allatulluunniit aningaasaliisussarsionnikkut.

Kiisalu illunik nukissamik sipaarniarfiusunik klasse 1-inik aamma 2-nik sanaartukkat annertussusaasa tapiiffigineqarsinnaatitaasut sananeqarnerinut aningaasartuutit tamarmiusut 40 procentiinut taarsigassarsititsisoqarsinnaasoq allassimavoq.

Inissianik nutaanik sanaartornermi illunik nalinginnaasunik imaluunniit illunik nukissamik sipaarniarfiusunik klasse 1-inik 2-nilluunniit sananissaq toqqarneqartassaaq, aaqqiissutissatut taaneqartuni annertussutsumut tapiiffigineqarsinnaatitaasumut inissiamik ataasiinnarmik sananissamut aningaasartuutissat tamarmiusut 40 procentii tikillugit taamaallaat taarsigassarsititsisoqarsinnaammat.

Imm. 1-imut

Imm. 1 ilaatigut nutaajuvoq ilaatigullu Inatsisartut peqqussutaanni siornatigut atuuttumi nr. 4-mi 30. oktober 1998-imeersumi kingusinnerusukkut allannguuteqartinneqartumi, § 4, imm. 1-imik aamma 2-mik ataatsimoortitsinerulluni. Erseqqissarneqarpoq tamatumani Naalakkersuisut kommunalbestyrelsillu inissianut nutaanut aningaasalersuutissatut taarsigassarsititsisinaanerat pineqartoq.

Aallaavigineqartoq tassaavoq, sanaartornermut aningaasartuutit tamarmiusut 40 procentii tikillugit pisortat taarsigassarsiarititassaat imm. 2-mi, 3-mi, 4-mi aamma 5-mi inissiap angissusissaatut aningaasanullu killissarititatus aalajangersarneqartut naapertorlugit Naalakkersuisunit kommunalbestyrelsillu, tamarmik immikkut 20 procentit tikillugit taarsigassarsiaritineqarsinnaasut.

Allannguutissatut siunnersuutip kingunerissavaa, taarsigassarsititsisussani arlaat taarsigassarsititsinngikkaluarpat, taarsigassarsiat aningaasartaannut tamarmiusunut 40 procentit tikillugit Naalakkersuisut kommunalbestyrelsiluunniit taarsigassarsititsisinnaasut. Periarfissap atuler-

seqqinneranut tunngavigineqartoq tassaavoq soorlu assersuutigalugu sanaartornermut aningaasartuutit tamarmiusut 40 procentiisa pisortanit taarsigassarsiarineqarsinnaasut tamakkii-sut taarsigassarsititsisinnaasut arlaannik taarsigassarsiaritinneqarsinnaaneri siunissami sanaar-tugassani pisariaqartinneqalersinnaasoq Naalakkersuisut naatsorsuutigimmassuk.

Taarsigassarsititsisussani arlaata – Naalakkersuisut imaluunniit kommunalbestyrelsip – taar-sigassarsiarititassaminik taarsigassarsititsinnginnerata tunngavilersorneqarnissaa pisariaqan-gilaq. Tamatuma kingorna apeqqutaatinneqassanngilaq soorlu aningaasaqarnikkut ajornar-torsiorneq imaluunniit pingaarnersiunerit allat tunngaviunersut.

Aalajangersakkap oqaasertaliornera malillugu taarsigassarsititsisussat tamarmik immikkut 20 procentit tikillugit, imaluunniit taarsigassarsititsisussat arlaat taarsigassarsititsinngippat, aappa 40 procentit tikillugit taarsigassarsititsisinnaavoq. Taamalilluni taarsigassarsititsisussani aap-paa sanaartornermut aningaasartuutit tamarmiusut 10 procentiinik, aappaalu sanaartornermut aningaasartuutit 30 procentiinik taarsigassarsititsisinnaanngillat. Aammattaaq allaanerusumik procentinnguisoqarsinnaassanngilaq, taamaallaat 20 procentinik imaluunniit 40 procentinik taarsigassarsititsisoqarsinnaassalluni.

Sanaartornermut aningaasartuutit tamarmiusut sunik imaqarnerannut erseqqinnerusumik killi-liussat pillugit, illuliortiternernut aningaasalersuineq pillugu Inatsisartut peqqussutaanni nr. 1-imi 7. maj 2007-imeersumi § 6, imm. 2-mut oqaaseqaatit innersuussutigineqarput.

Imm. 2-imut

Imm. 2-imi illuliortiternernut aningaasalersuineq pillugu Inatsisartut peqqussutaanni atuuttu-mi § 4, imm. 2, aallaqqaasiussami oqaatsitigut ataatsimik allannguuteqartillugu ingerlateqqin-neqarpoq.

Imm. 2-mi Naalakkersuisut kommunalbestyrelsillu taarsigassarsiarititassaannut inigisap an-nertussusissaanut killiliussaq aalajangersarneqarpoq.

Annertussuseq taarsigassarsititsivigineqarsinnaasoq annerpaaq 110 kvadratmeterisut anner-tussuseqarpoq.

Imm. 3-imut

Imm. 3-imi illuliortiternernut aningaasalersuineq pillugu Inatsisartut peqqussutaanni atuuttu-mi § 4, imm. 3, aallaqqaasiussami oqaatsitigut ataatsimik allannguuteqartillugu ingerlateq-qinneqarpoq.

Siunnersuummi 65 kvadratmeterinut siullernut aningaasaliissutissanut killiliussat 15.500 ko-ruuninut aalajangersarneqarput, 45 kvadratmeterinulli tulliuttunut, tassalu 66 kvadratmeteri-niit 110 kvadratmeterinut, aningaasaliissutissanut killiliussat 10.250 koruuninut aalajanger-sarneqarlutik. Killiliussat taakkua tamarmik nassatarisaanik Naalakkersuisunit kommunalbes-tyrelsimillu taarsigassarsiat amerlanerpaamik 293.750 koruuniusinnaapput (= (15.500 kr. 65 x kvadratmeterit)+(10.250 kr. x 45 kvadratmeterit) 20 procentii).

Tamatumani siunertaavoq inissiat mikinerusut, amerlanertigut inissianut anginerusunut naleq-qiullutik kvadratmeterimut akisunerusartut, aningaasalersorneqarsinnaanissaat.

Imm. 4-imut

Imm. 4 immikkoortutut nutaatut ikkunneqarpoq.

Imm. 4-imi Naalackersuisut kommunalbestyrelsilu illunik nukissamik sipaarniarfiusunik klasse 1-inik sananissamut taarsigassarsititsinissaat periarfissinneqarpoq. Imm. 4 naapertorlugu aningaasartassarititaasut illunik nukissamik sipaarniarfiusunik klasse 1-imik sanasoqarnissaanut naleqqiullugu aalajangersarneqarput.

Siunnersuummi 65 kvadratmeterinut siullernut aningaasartassarititaasut 17.000 koruuninut killilerneqarput, kiisalu 45 kvadratmeterinut tulliuttunut, tassalu 66 kvadratmeteriniit 110 kvadratmeterit ilanngullugit aningaasartassarititaasut 11.250 koruuninut killilerneqarlutik. Killiliinerup kingunerisaanik Naalackersuisut kommunalbestyrelsillu taarsigassarsiarititassaak katillugit 322.205 koruuninik (= (17.000 koruunit x 65 kvadratmeterit) + (11.250 koruunit x 45 kvadratmeterit) 20 procentiinik) annertussuseqarsinnaapput.

Taamatuttaaq illunik nukissamik sipaarniarfiusunik klasse 1-inik sanaartornermi siunertaavoq, inissianik mikisunik, amerlanertigut inissianut anginerusunut naleqqiullutik kvadratmeterimut akitigut akisunerusartunik sanaartornissap aqutissiuunneqarnissaa.

Illunik nukissamik sipaarniarfiusunik klasse 1-inik qaasuitsup kujataani avannaanilu, ersarinnerusumik taallugu killeqarfik 1-imi aamma killeqarfik 2-mi sananeqarneranni nukissamut tunngasortaak illuliornermut malittarisassanut ilaliussami aalajangersarneqarput, tassanilu killeqarfik 1-imi qaasuitsup kujataani illuliat pineqarput, aammalu killeqarfik 2-mi qaasuitsup avannaani illuliat pineqarlutik.

Imm. 5-imut

Imm. 5 immikkoortutut nutaatut ikkunneqarpoq.

Imm. 5-imi Naalackersuisut kommunalbestyrelsilu illunik nukissamik sipaarniarfiusunik klasse 2-nik sananissamut taarsigassarsititsinissaat periarfissinneqarpoq. Aningaasartassarititaasut illunik nukissamik sipaarniarfiusunik klasse 2-mik sanasoqarnissaanut naleqqiullugu aalajangersarneqarput.

Siunnersuummi 65 kvadratmeterinut siullernut aningaasartassarititaasut 16.250 koruuninut killilerneqarput, kiisalu 45 kvadratmeterinut tulliuttunut, tassalu 66 kvadratmeteriniit 110 kvadratmeterit ilanngullugit aningaasartassarititaasut 10.750 koruuninut killilerneqarlutik. Killiliinerup kingunerisaanik Naalackersuisut kommunalbestyrelsillu taarsigassarsiarititassaak katillugit 308.000 koruuninik (= (16.250 koruunit x 65 kvadratmeterit) + (10.750 koruunit x 45 kvadratmeterit) 20 procentiinik) annertussuseqarsinnaapput.

Tassanissaaq illunik nukissamik sipaarniarfiusunik klasse 2-nik sanaartornermi siunertaavoq, inissianik mikisunik, amerlanertigut inissianut anginerusunut naleqqiullutik kvadratmeterimut akitigut akisunerusartunik sanaartornissap aqutissiuunneqarnissaa.

Illunik nukissamik sipaarniarfiusunik klasse 2-nik qaasuitsup kujataani avannaanilu, ersarinnerusumik taallugu killeqarfik 1-imi aamma killeqarfik 2-mi sananeqarneranni nukissamut tunngasortaak illuliornermut malittarisassanut ilaliussami aalajangersarneqarput, tassanilu killeqarfik 1-imi qaasuitsup kujataani illuliat pineqarput, aammalu killeqarfik 2-mi qaasuitsup avannaani illuliat pineqarlutik.

Imm. 6-imut

Imm. 6 Inatsisartut peqqussutaanni atuuttumi § 4, imm. 4-mik ingerlatitseqqinneruvoq. Aalajangersagaq naapertorlugu taarsigassarsisup sanaartornermut aningaasartuutit tamakkiisut

sinnerinik nammineerluni aningaasalersuinissaa pisortanit taarsigassarsinissamut piumasagaataavoq. Imm. 6 tunngavigalugu taarsigassarsisoq 110 kvadratmeterinit anginerusumik kiisalu 65 kvadratmeterinit siullernut 15.500 koruuninit imaluunniit 17.000 koruuninit imaluunniit 16.250 koruuninit akisunerusumik, kiisalu 45 kvadratmeterinit tulliuttunut 10.250 koruuninit imaluunniit 11.250 koruuninit imaluunniit 10.750 koruuninit akisunerusumik sanatitsisinnavaoq, taarsigassarsisoq taarsigassarsiarineqarsinnaatitaasut saniatigut aningaasartuutinik tamakkiisunik aningaasaliisinnaaguni.

Nr. 2-imut

Aalajangersagaq najoqqutassatigut annikitsunik allannguuteqarluni Inatsisartut peqqussutaanni nr. 4-imi, 30. oktober 1998-imeersumi, kingusinnerusukkut allannguuteqartinneqartumi § 5, imm. 1-imut, 2-imut aamma 4-imut assiguvuq.

Imm. 1-imut

Imm. 1-ip najoqqutassatigut ikittunik allannguuteqarluni Inatsisartut peqqussutaanni nr. 4-imi, 30. oktober 1998-imeersumi, kingusinnerusukkut allannguuteqartinneqartumi § 5, imm. 1-ip immikkoortuanut siullermut assiguvuq. Imm. 1-imi pisortat taarsigassarsiarititaasa, 40 procentit tikillugit annertussuseqartut akilerneqarnissaannut piffissaq aalajangersarneqarpoq. Inuup allap suliamut attuumassuteqanngitsup sanaartornermut naatsorsuutinik inaarutaasumik akuerisanik suliaqarnissaa atsiuinissaalu taarsigassarsisup akisussaaffigaa. Sanaartornermut naatsorsuutit assersuutigalugu taarsigassarsisup aningaasalersuinermi siunnersortaanit, kukkunerisuisuanit, sanatitsisutut siunnersortaanit imaluunniit sanasumit sanaartornermik isumaginnittuusimasumit atsiorneqarsinnaapput. Taarsigassarsisoq nammineerluni, imaluunniit taarsigassarsisup eqqartuussissuserisua, aningaaserivia allatulluunniit taarsigassarsisumut siunnersortaaq pisortat taarsigassarsiarititaannut qularnaveeqqutissatut qularnaveeqqusiussaarluni taarsigassarsinermi allagartap suliarineqarnissaa isumagisussaavaa, tassungalu ilanngullugu uppersartaatissat naqeqqaarneri Naalakkersuisunut kommunalbestyrelsimullu, taaku tunngavigalugit taarsigassarsiassanik tunniussisussanut nassiunneqannginnerini, qularnaveeqqusiussaarluni taarsigassarsinermi allagartap Akileraarnermut Pisortaqarfimmit naqissuserneqarnissaa aammalu Kalaallit Nunaanni Eqqartuussivimmi nalunaarsuiffimmut nalunaarsorneqarnissaa isumagisussaallugu. Kiisalu inissiap sillimaserneqarsimanissaa taarsigassarsisup isumagisussaavaa.

Kiisalu § 4, imm. 1 naapertorlugu taarsigassarsiarititat aatsaat atuilernissamut akuersissumik takutitsinikkut tunniunneqarsinnaapput. Sanaartukkap naammassineqarsimaneranut aammalu illuliornermut inatsisit atuuttut naapertorlugit sananeqarsimaneranut taassuma qularnaveeqqutaanissaa tamatumunnga tunngavigineqarpoq.

Qularnaveeqqusiiffigisap nalunaarutaata naqeqqaarneranik piumasagaat peerneqarpoq, pissuseq taanna aningaasalersuineramik ingerlataqarneq pillugu inatsimmi, kunngip peqqussutaatigut nr. 1252, 15. december 2004-imeersukkut atuutilersinneqartumi § 60-imi inatsiseqartinneqarmat.

Qularnaveeqqusiiffigisap nalunaarutaanik piumasagaammi, assersuutigalugu piginnittut nikkinneranni imaluunniit sillimmasiinermit akiliummut akiitsoqalernerup kingunerisaanik inissiamut sillimmasiissut unitsinneqassagaluarpat, Naalakkersuisut kommunalbestyrelsimullu qularnaveeqqummik piginnittutut ilisimatinneqarnerisigut inissiap sukkulluunniit sillimmaser-simanissaata qularnaarneqarnissaa siunertarineqarsimavoq.

Pisortanit taarsigassarsiarititassat siusinnerpaamik qaqugukkut tunniunneqarnissaat imm. 1-imi erseqqissarneqarpoq. Kommunalbestyrelsi 2009-mi akilerneqartussanik taarsigassarsititsinissamut neriorsuuteqarsimappat, kiisalu Naalakkersuisut 2008-mi akilerneqartussanik taarsigassarsititsinissamut neriorsuuteqarsimappata, taarsigassarsisup inissiaq 2008-mi naammassineqarsimagaluartoq aammalu inatsisit malillugit atulerneqarsimagaluartoq kommunimit taarsigassarsiassami aatsaat 2009-mi akilerneqarnissaat utaqqisariaqarpaa.

#### Imm. 2-imut

Imm. 2-ip imarisamigut Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 5, imm. 1-ip immikkoortua tulleg assingaa. Pisortat taarsigassarsiarititaat inissiap, Kalaallit Nunaanni qularnaveeqqusiussaqaarluni taarsigassarsinermi allagartat pillugit inatsit naapertorlugu nalunaarsorneqarsimasup qularnaveeqqusiunneratigut qulakkeerneqassapput. Inissiap qularnaveeqqusiunneratigut pisortat taarsigassarsiarititaat qulakkeerneqarpata, pisortat taarsigassarsiarititaasa akilersorneqarnissaasa tulleriaarneqartarnerannut aalajangersagaq malillugu tulleriaarisooqassaaq. Qularnaveeqqusiiffiu-soq pingaarneq qanoq annertutigisumik akiitsunik amerliliinissamut akuersinissamut periarfissaqaarnersoq qularnaveeqqusiussaqaarluni taarsigassarsinermi allagartami allassimavoq. Kiisalu Kalaallit Nunaanni qularnaveeqqusiussaqaarluni taarsigassarsinermi allagartat pillugit inatsit aammalu qularnaveeqqusiussaqaarluni taarsigassarsinermi allagartanut maleruagassat nalinginnaasut tamatumunnga atuutsinneqarput.

#### Imm. 3-imut

§ 7, imm. 3, nutaajuvoq.

Inissiami akiitsut saniatigut inissiap nalinga qularnaveeqqusiullugu taarsigassarsiat § 4, imm. 1 naapertorlugu taarsigassarsiarititat akilerneqareernerini akilerneqartussatut inissinneqartussaanninnerat immikkoortumi erseqqissarneqarpoq. Illuliortiternernut aningaasalersuinnermut aaqqissuussami inuit amerlanerusut namminneerlutik inissianik imminnut pilersorsinnaalernissaasa qulakkeerneqarnissaa siunertarineqarpoq. Taamaattumik aaqqissuussinermi pisortat taarsigassarsiarititaat taarsigassarsiatut uninngatikkallarneqartussatut, ukiuni 20-ni siullerni erniaqanngitsutut akilersugassaannngitsutullu tunniunneqartarput, tamatumalu kingorna pisortat taarsigassarsiarititaat akiligassanngortinneqassapput, ukiunut 15-inut aningaasartaat amerlaqatigiinnut agguarlugit akilersorneqassallutik.

Taarsigassarsialik inissiamik illumilluunniit sanasimaguni, tamatumunngalu atatillugu pisortat aningaasaleeqataassutissaannik tamakkiisunik pissarsisimaguni, taamatullu 810.000 koruuninik realkreddittimit assersuutigalugu ukiuni 20-ni akilersugassanik taarsigassarsisimaguni, realkreddittimut taarsigassarsianut ukiumut akiligassat ilanngaaserneqanngitsut 60.750 koruuniussapput, tassalu qaammammut 5.062,50 koruuniussallutik. Assersuutigalugu ukiut tallimat qaangiunnerini inissiami akiitsut saniatigut inissiaq 375.00 koruuninik naleqartoq paasinarsissappat, aammalu pisortat taarsigassarsititsisuusimasut inissiami akiitsut saniatigut inissiap nalinga qularnaveeqqusiullugu taarsigassarsisinnaaneq akuerisimappassuk, taarsigassarsiallip qaammammut akiliutai ilanngaasigaanngitsut 2.343,75 koruuninik ilasussaapput, tassalu qaammammut akiliutit ilanngaasigaanngitsut 46,3 procentinik qaffattussaallutik.

Inissiami iluarsaassinernut, pitsanngorsaanernut, ilanngullugit nukissamik sipaarniarfiusunik suliaqarnerit, alliliinernullu taarsigassarsiat akilerneqareernerini § 4, imm. 1 naapertorlugu taarsigassarsiat akilerneqartussatut inissinneqarnissaat aalajangersakkami aalajangersarneqarpoq. Tamanna tunngavigalugu inissiap nalinganut qaffaataasumik inuulluataarniutinik, soorlu

uffarfinnik supoortulinnik, aalartitsivinnik (sauna), igaffimmi uffarfimmilu atortunik akisuu-  
nik nutaanik iluarsaassinernut pitsanngorsaannullu taarsigassarsiarititat siulliullutik akiler-  
neqartussannngussapput, kisiannili aatsaat inissiap nalingata qaffasinnerulerneranik kingune-  
qartumik annertussusilerneqarsimagunik. Taarsigassarsiallip assersuutigalugu uffarfimmik  
aalartitsivimmik 39.000 koruuninik akeqartumik ikkussinerani, inissiap niuernermin nalingata  
5.000 koruunit, tassalu uffarfiup nalinginnaasup nalinga sinnerlugu qaffannissaa qulakkeerne-  
qarsinnaangilaq.

Tamatuma peqatigisaanik § 4, imm. 1 naapertorlugu taarsigassarsiat aamma inissiami allilii-  
nernut taarsigassarsiat akilerneqareernerini akilerneqartussatut inissinneqarnissaat aalajanger-  
sakkami aalajangersarneqarpoq. Inissiap allilerneqarnera inissiami alliliissutissat kvadratme-  
terinngorlugit imaluunniit inissiap pisoqaassusaanut killiligaangilaq.

Aalajangersagaq naapertorlugu § 4, imm. 1 naapertorlugu taarsigassarsiat inissiami aningaa-  
sartuutiviusut uppersarsarneqarsimasut tunngavigalugit iluarsaassinissamut, pitsanngorsaanis-  
samut, ilanngullugit nukissamik sipaarniarfiusunik suliaqarnerit, alliliinissamullu taarsigassar-  
siarititat akilerneqareernerini akilerneqartussatut inissisimapput, tassanilu inissiap nalimigut  
qaffaatissaatut missiliorneqartut pineqanngillat.

#### Imm. 4-imut

Imm. 4-ip oqaasertamigut annikitsunik allannguuteqarluni Inatsisartut peqqussutaanni nr. 4-  
mi, 30. oktober 1998-imeersumi, kingusinnerusukkut allannguuteqartinneqartumi § 5, imm. 2  
assingaa. Pisortanut taarsigassarsiat qanoq akilersorneqassanersut aalajangersakkami nas-  
suarneqarpoq. Ukiuni 15-ini taarsigassarsiat akilersorneqarfissaanni erniarititat aalajangersi-  
masuupput. Erniarititassat ullormi atuilernissamut akuersissuteqarfiusumiit ukiuni 20-ni er-  
nianut tunngaviusut 3 procentpointimik ilallugit piffissamut akilersuiffiusussamut tamarmiu-  
sumut aalajangersarneqassapput.

#### Imm. 5-imut

Imm. 5-ip oqaasertamigut allannguuteqarluni Inatsisartut peqqussutaanni nr. 4-mi, 30. oktober  
1998-imeersumi, kingusinnerusukkut allannguuteqartinneqartumi § 5, imm. 4 assingaa. Naa-  
lakkersuisut pisortanit taarsigassarsiarititat akilersorneqarnissaannut maleruagassanik aalaja-  
ngersaanissaannut aalajangersagaq inatsisitigut tunngavissaavoq. Piginnaatitsissut suli atorne-  
qanngilaq. Peqqussut naapertorlugu taarsigassarsinissamut neriorsuutit siulliit 1998-imi tun-  
niunneqarsimanagerat, aammalu taarsigassarsiat ukiuni 15-ini erniaqartussaannnginnerat akiler-  
sugassaannnginnerallu, 1998-imilu taarsigassarsiarititat 2013-imiit akilersorneqartussanngor-  
tussaanagerat eqqarsaatigalugu, piffissaq taanna sioqqullugu piginnaatitsinermut aalajangersak-  
kap atorneqarnissaa eqqarsaatigineqanngilaq. Piginnaatitsissutitut aalajangersakkap atorne-  
qarnissaata tungaanut taarsigassarsiat akiligassannngortut kontomut pingaarnermut 20.10.22  
“isertitat allat”-nut isertitatut naatsorsuusiorneqassapput, tamatumalu kingorna Nunap Karsia-  
nut nakkartinneqassallutik.

#### Nr. 3-imut

§ 8 aalajangersakkamut atuuttumut naleqqiulluni allatut oqaasertalerneqarpoq, tassungalu  
imm. 2-mik nutaanik ilassusiisoqarpoq.

#### Imm. 1

Imm. 1 nutaanik ilassuserneqarpoq.

Aalajangersakkap oqaasertalerneqarnera tunngavigalugu § 4, imm. 1 aamma 4 naapertorlugit taarsigassarsiat taarsigassarsianik aaqqissuusseqqinnermi imaluunniit piginnittut nIKinneranni akiligassanngortinneqassanngillat. Kiisalu aaqqissuusseqqinnermi piginnittullu nIKinnerini tamani Naalakkersuisut kommunalbestyrelsillu ilisimatinneqartarnissaat, taamaalillutillu Naalakkersuisut kommunalbestyrelsillu inissiat taarsigassarsititsivigineqarsimasut qanoq pinerinik ilisimatinneqartarnissaat aalajangersakkami aalajangersarneqarpoq.

Imm. 2-imut

Imm. 2-imi aalajangersagaq nutaajuvoq.

Taarsigassarsiat siuliani pineqartut aaqqissuuteqqinneqarnerat tassaavoq, aaqqissuusseqqinneq qanoq ittorluunniit pineqaraluarpat aaqqissuusseqqinneq imaluunniit allanngortitsineq. Matumani taarsigassarsianik allanngortitsineq, tassalu taarsigassarsianik aaqqissuusseqqinneq kisimi pineqarpat, pisinermi akiusoq aningaasaliiffigineqartoq, inissiap niuerutigineqarnerani atorineqartoq kingulleq aallaavittut pingaarutilittut atorineqassaaq. Inissiap akiitsut saniatigut nalinga qularnaveeqqusiullugu taarsigassarsititsisinnaanissaq pinngitsoorniarlugu taamatut killiliisoqarpoq.

Imm. 3-imut

Immikkoortoq 3-imi Immikkoortumi ”pisinermi akiusup 90 procentianik” imatut allanngortinneqarpoq ”pisinermi akiusup aningaasalersorneqartup 90 procentianik”.

Aalajangersakkami piginnittut nIKinneranni taarsigassarsiat ataatsit arlallilluunniit Naalakkersuisut kommunalbestyrelsillu taarsigassarsiarititaanit salliutillugit akilerneqartussatut inissinneqartussat annertussusissaat aalajangersarneqarpoq. Naalakkersuisut kommunalbestyrelsillu taarsigassarsiarititaannit taamaallaat salliutinneqassapput taarsigassarsiat aammattaaq inissiaq qularnaveeqqusiullugu qularnaarneqarsimasut. Piginnittoq nutaaq nutaanik taarsigassarsisinaavoq imaluunniit piginnittuusimasup taarsigassarsiai tigussinnaallugit.

Atuuffissaa imatut assersuusiorlugu takutinneqarsinnaavoq:

Tunisisoq inissiamik 110 kvadratmeterimik, kvadratmeterimut 16.000 koruuninik akeqartumik inissialiorsimavoq.

Inissiap sananeqarneranut aningaasartuutit tamakkiisut 1.760.000 koruuniupput, taakkunanngalu 293.750 koruunit Naalakkersuisunit taarsigassarsiaapput, aammalu 293.750 koruunit kommunalbestyrelsimit taarsigassarsiaallutik, kiisalu taarsigassarsisup aningaasartuutinit sineruttut 1.172.500 koruuniusut taarsigassarsinermigut, amerlanertigut kreditforeninginit taarsigassarsiaasartunik, nammineerluni aningaasalersussavai.

Inissiap sananeqarneranit ukiut tallimat qaangiuttut piginnittup inissiaq tunivaa. Inissiaq 2.100.000 koruuninik nalilerlugu tunineqarpoq, tassunga aningaasalersuinnermut aningaasartuutit 100.000 koruuniusut ilanngunneqassallutik. Pisisoq piginnittut nIKinnerannut atatillugu 2.200.000 koruunit 90 procentiini, taakkunanngaanniillu 293.750 koruunit marluk, tassa Naalakkersuisunit kommunalbestyrelsimit taarsigassarsiat annertoqqataat ilanngaatilugit kreditforeninginit nutaanik taarsigassarsinissamut periarfissaqarpoq. Tassalu pisisoq kreditforeninginit annerpaamik 1.392.500 koruuninik taarsigassarsisinaavoq, taakkulu Naalakkersuisunit kommunalbestyrelsimit taarsigassarsianit salliutillugit akilerneqartussatut inissinneqassapput.

Pisisup nutaanik taarsigassarsiaasa Naalakkersuisunit kommunalbestyrelsimit taarsigassarsianit salliutillugit akilerneqartussatut inissinneqartussat annerpaaffilerneqarnera ilanngunneqarpoq, piginnittut nIKinneranni Naalakkersuisut kommunalbestyrelsillu qularnaveeqqusiiffigineqarnerisa ingerlaannarsinnaanera qulakkeerniarlugu.

Pisinermi akiusup aningaasalersorneqartup, tassalu pisinermi akiusorpiaannaanngitsup, 90 procentia ikkunneqarpoq tunisinermut atatillugu nuussinermut aningaasartuutit tunisinermut akiusumut ilanngunneqarsinnaammata.

”pisinermi akiusup 90 procentianik” imatut allanngortinneqarpoq ”pisinermi akiusup aningaasalersorneqartup 90 procentianik”.

Aalajangersakkami piginnittut nikerinneranni taarsigassarsiat ataatsit arlallilluunniit Naalakkersuisut kommunalbestyrelsillu taarsigassarsiarititaanit salliutillugit akilerneqartussatut inissinneqartussat annertussusissaat aalajangersarneqarpoq. Naalakkersuisut kommunalbestyrelsillu taarsigassarsiarititaanit taamaallaat salliutinneqassapput taarsigassarsiat aammattaaq inissiaq qularnaveeqqusillugu qularnaarneqarsimasut. Piginnittoq nutaaq nutaanik taarsigassarsisinaavoq imaluunniit piginnittuusimasup taarsigassarsiai tigussinnaallugit.

Atuuffissaa imatut assersuusiorlugu takutinneqarsinnaavoq:

Tunisisoq inissiamik 110 kvadratmeterimik, kvadratmeterimut 16.000 koruuninik akeqartumik inissialiorsimavoq.

Inissiap sananeqarneranut aningaasartuutit tamakkiisut 1.760.000 koruuniupput, taakkunanngalu 293.750 koruunit Naalakkersuisunit taarsigassarsiaaapput, aammalu 293.750 koruunit kommunalbestyrelsimit taarsigassarsiaallutik, kiisalu taarsigassarsisup aningaasartuutinit sinneruttut 1.172.500 koruuniusut taarsigassarsinermigut, amerlanertigut kreditforeninginit taarsigassarsiaasartunik, nammineerluni aningaasalersussavai.

Inissiap sananeqarneranit ukiut tallimat qaangiuttut piginnittup inissiaq tunivaa. Inissiaq 2.100.000 koruuninik nalilerlugu tunineqarpoq, tassunga aningaasalersuinermit aningaasartuutit 100.000 koruuniusut ilanngunneqassallutik. Pisisoq piginnittut nikerinnerannut atatillugu 2.200.000 koruunit 90 procentiinik, taakkunanngaanniillu 293.750 koruunit marluk, tassa Naalakkersuisunit kommunalbestyrelsimillu taarsigassarsiat annertoqqataat ilanngaatilugit kreditforeninginit nutaanik taarsigassarsinissamut periarfissaqarpoq. Tassalu pisisoq kreditforeninginit annerpaamik 1.392.500 koruuninik taarsigassarsisinaavoq, taakkulu Naalakkersuisunit kommunalbestyrelsimillu taarsigassarsianit salliutillugit akilerneqartussatut inissinneqassapput.

Pisisup nutaanik taarsigassarsiassaasa Naalakkersuisunit kommunalbestyrelsimillu taarsigassarsianit salliutillugit akilerneqartussatut inissinneqartussat annerpaaffilerneqarnera ilanngunneqarpoq, piginnittut nikerinneranni Naalakkersuisut kommunalbestyrelsillu qularnaveeqqusiiifigineqarnerisa ingerlaannarsinnaanera qulakkeerniarlugu.

Pisinermi akiusup aningaasalersorneqartup, tassalu pisinermi akiusorpiaannaanngitsup, 90 procentia ikkunneqarpoq tunisinermut atatillugu nuussinermut aningaasartuutit tunisinermut akiusumut ilanngunneqarsinnaammata.

Nr. 4-imut

Aalajangersagaq iluarsineqarpoq, Inatsisartut peqqussutaanni atuuttumi kukkusumik inner-suussisimaneq pissutigalugu. Innersuussutigineqartoq eqqortoq tassaavoq qularnaveeqqusii-sarneq pillugu Kalaallit Nunaannut inatsit nr. 154, 10. maj 1967-imeersoq, kingusinnerusukut allannguuteqartinneqartoq.

Nr. 5-imut

Aalajangersakkami erseqqissaassutigineqarpoq, inissiani attartortittakkani namminersortunit pigineqartuni ineqarnermut akiliutip aningaasartuutit malillugit annertussusilerneqartarnera-

nut maleruagassanik, tak. inissianik attartortitsisarneq pillugu Inatsisartut peqqussutaanni § 33, unioqqutitsineq Naalakkersuisut kommunalbestyrelsilluunniit taarsigassarsiarititaasa akileqquneqarnerannik kinguneqassasoq.

Maannamut oqaasertaliuinermi ersernerluppoq attartornermut akigitinneqartut pillugit malittarisassat sorliit innersuussutigineqarnersut. Taamaalilluni tamatuma erseqqissarneqarnissaa pingaaruteqarpoq, tassami ineqarnermut akiliutip naatsorsornissaanut malittarisassat assigiingissuteqarmata, apeqqutaalluni namminersortut imaluunniit pisortat illuutaat attartortittakkat pineqarnersut.

Aalajangersagaq naapertorlugu inissiamik attartortittakkamik namminersortumit pigineqartumik attartortitsinermi, taarsigassarsisup aningaasartuutit malillugit attartornermut akiliutissamit qaffasinnerusumik akeqartitsilluni attartortitsinera taarsigassarsiat akiligassanngortinneqarnerinut tunngaviussaaq. Tamanna tunngavigalugu taarsigassarsisup annerpaamik aningaasartuutit naapertorlugit attartortitsinermit akigititassaq, inissianik attartortitsisarneq pillugu Inatsisartut peqqussutaanni § 33 naapertorlugu taarsigassarsisup aningaasalersuinermit aningaasartuutai uppernarsarneqarsimasut, ingerlatsinermit aningaasartuutai uppernarsarneqarsimasut kiisalu inissiap teknikkikkut aningaasaqarnikkullu nalinganut erniarititat, diskontop affaanik naleqartut, naapertorlugit annertussusilertussaavai.

Ineqarnermut akiliutip aalajangersarneqartarnera pillugu inissianik attartortitsisarneq pillugu peqqussummi aalajangersakkani pineqaatissiisinnaanissaq pillugu immikkut aajangersaanissaq pisariaqarsorineqarpoq, siunnersuummi matumani ineqarnermut akiliutip inissianik attartortitsisarneq pillugu peqqussummi ineqarnermut akiliummik aalajangersaasarneq pillugu maleruagassanik unioqqutitsineq Naalakkersuisut kommunalbestyrelsillu taarsigassarsititsisutut uparuarsinnaammassuk, kiisalu inissianik attartortitsisarneq pillugu peqqussummi naapertorlugu ineqarnermut akiliutip annertussusilernerani inissianik attartortitsisarneq pillugu peqqussummi tamatumunnga aalajangersakkat unioqqutinneqarnerat attartortup saqqummiussinnaallugu. Aammattaaq Naalakkersuisut kommunalbestyrelsillu taarsigassarsisitsisutut taarsigassarsisumut attartortitsisumullu, akit naapertuutinnngilluinnartut atorlugit inissiaatiminnik attartortitsisumut pineqaatissiisinnaanissaat kissaatiginarpoq.

Nr. 6-imut

Aalajangersagaq nutaajuvoq aammalu erseqqissaataalluni inissiat nutaat sananeqartut sorliit Naalakkersuisut kommunalbestyrelsillu taarsigassarsititsinikkut tapiiffigissallugit kissaatiginerat. Tapersiissutinik aaqqissuussinermi inuinnarnut ineqarnikkut pitsaanagerusunik atugassaqartitsinissaq anguniakkat pingaernerit ilagimmassuk, aalajangersakkami erseqqissarneqarpoq, taarsigassarsisup inissiaq assersuutigalugu akunnittarfittut attartortippagu, unnuisarfittut attartortippagu assigisaattulluunniit atorpagu, Naalakkersuisut kommunalbestyrelsillu taarsigassarsiarititaat akiligassanngussasut. Akunnittarfittut attartortitsineq, unnuisarfimmik attartortitsineq assigisaallu paasineqassaaq inissiaq tamarmi ilaannaaluunniit atorneqartoq. Assigisaannik oqaaseq paasineqassaaq: Bed and breakfast, vandrehjemmi, hut, summer house, apartment rental, can Inn Hotel, cabins, camp, guesthouse, hostel youth hostel, rooms, lodge aammat hotel apartments ilaalu ilanngullugit. Aammattaaq illuliortiternernut aningaasalersuineq pillugu Inatsisartut peqqussutaat nr. 1, 7. maj 2007-imeersumi § 1, imm. 2-mut oqaaseqaatit innersuussutigineqarput.

Nr. 7-imut

Aalajangersagaq najoqqutassatigut annikitsunik allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukut allannguuteqartinneqartumi § 9, imm. 1 assingaa. Suliassat nukissamik sipaarniuteqarfiusut aalajangersakkamut ilanngunneqarput.

Naalakkersuisut inissiani pioreersuni iluarsaassinernut, pitsanngorsaanernut, tassungalu ilanngullugu nukissamik sipaarniarfiusunik suliaqarnissamut aammalu alliliinermut taarsigassarsititsinnaanerit aalajangersakkami aalajangersarneqarpoq. Naalakkersuisut kisimik taarsigassarsititsinissamut periarfissaqarput.

Inissiani pioreersuni nukissamik sipaarniarfiusunik suliaqarnissamut, taamaalillunilu inissiat nukissamik sipaaruteqarnerulersinnaanerit anguniarlugu taarsigassarsititsinnaaneq aalajangersakkami aalajangersarneqarpoq. Taamaalilluni suliat nukissamik sipaarniarfiusut inissiat pioreersut piorsarneqarnerinut tapertatut atuuttussaapput.

Inuinnaat inissianik piginnittut aammalu maanna taakkunani najugaqartut tamarmik taarsigassarsinissamik qinnuteqarsinnaapput. Tamanna assersuutigalugu aamma inissianut, Namminersornerullutik Oqartussat kommunillu inissiaataannik attartortittakkanik inissianut nammineq pigisanut allanngortinneqartarnerat pillugu Inatsisartut peqqussutaanni maleruagassat malillugit attartortumiit piginnittumut aaqquissuussineq naapertorlugu tigu-neqarsimasunut atuuppoq.

Kisiannili BSU-mit taarsigassarsilluni illuliamik piginnittoq akilersukkaminik taarsigassarsialik iluarsaassinernut, pitsanngorsaanernut, tassungalu ilanngullugu nukissamik sipaarniarfiusunik suliaqarnissamut aammalu alliliinermut taarsigassarsinnaangilaq, BSU-mit taarsigassarsilluni illuliat akilersukkanik taarsigassarsiviusimasut inissialiortiternermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaanni maleruagassat malillugit namminiivilluni pigineqartanngimmata. Taarsigassarsiat akilersukkat tassaapput taarsigassarsiat sulii akilersorneqartut, tamatumani piginnittup akilinngitsuukkaminik akiitsoqarnera akiitsoqannginneraluunniit apeqqutaatinneqanngilaq, aammalu taarsigassarsiat inissialiortiternermut tapersiissuteqartarneq pillugu Inatsisartut peqqussutaanni maleruagassat malillugit allanngortinneqarsimanersut, taamaalillunilu piginnittoq akilersuinngikkaluartoq taarsigassarsiat piffissamut akilersuiffiusumut appartikkiartuaarneqarnerisut apeqqutaatinneqarani.

Nr. 8-imut

§ 11-imi imm. 3 nutaatut ilanngunneqarpoq.

Suliassat nukissamik sipaarniarfiusut taamaallaat siunnersuummut ilanngussaq 1-imi allassimasunut tunngasuusut aalajangersarneqarpoq. Suliassanik ilanngussaq 1-imi allassimasunit allaanerusunik suliaqarnissaq kissaatigineqarpat, tamatumunnga Naalakkersuisunit taarsigassarsinissaq ajornartussaavoq.

Suliassanut nukissamik sipaarniarfiusunut taarsigassarsinissaq aatsaat anguneqarsinnaavoq, suliassat illumut tamarmut tunngasutut suliarineqassappata. Taamaattumik suliassat illumut tamarmiusumut tunngasutut suliarineqarnissaat, taamaattumillu illup ilaannaanut atuutinnginnissaat piumasarineqarpoq. Tassalu illup ilaminiinnannguani suliaqartoqassappat taarsigassarsititsisoqarnissaa siunertarineqanngilaq.

Inissiap annertussusaa apequtaatinnagu suliassanut nukissamik sipaarniarfiusunut taarsigassarsititsisoqarsinnaavoq. Taamaattumik suliassanut nukissamik sipaarniarfiusunut taarsigassarsititsinissamut illup annertussusaa pingaernerutinneqanngilaq killiliisussaananilu.

Suliassat nukissamik sipaarniarfiusut inissianik, 2007 sioqqullugu sananissamut akuersissuteqarfiusunik piginnittunit suliarineqarsinnaapput. Inissiani pisoqaanerusuni nutaanerusunilu suliassanik nukissamik sipaarniarfiusunik suliaqartoqarsinnaavoq. Inissiat nutaanerusut pisoqaanerusullu nukissamik sipaarniarfiusunik suliaqarfigineqarnissaminnut pisariaqartitsisarnerat tamatumunnga tunngavigineqarpoq, taamaattumillu taamatut suliaqarsinnaaneq periarfissaqartussaalluni.

Suliassat nukissamik sipaarniarfiusut sorpiaat Naalakkersuisunit taarsigassarsititsivigineqarsinnaanersut ilanngussaq 1-imi allassimapput. Ilangussaq 1-imi allassimasut tamakkiisuupput, taamaattumillu ilanngussami allassimannngitsunut suliassanut nukissamik sipaarniarfiusunut allanut taarsigassarsititsisoqarsinnaanngilaq.

Nr. 9-imut

Aalajangersakkami imm. 2-p, 4-p aamma 5-ip najoqqutassanik annikitsunik allannguuteqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9, imm. 2 aamma 3 assigai. Imm. 1 aamma 3 nutaajupput.

Imm. 1-imut

Imm. 1 nutaajuvoq, tassanilu Naalakkersuisut taarsigassarsiarititaat annerpaamik qanoq annertutigissanersut aalajangersarneqarpoq.

Nr. 1-imut

Naalakkersuisut iluarsaassinernut, pitsanngorsaanernut alliliinernullu annerpaamik 283.500 koruuninik taarsigassarsititsinnaanerat aalajangersakkami aalajangersarneqarpoq. Taamaattumik taarsigassarsisup aningaasartuutissai taarsigassarsititsiviusinnaasut annerpaamik 708.750 koruuniussapput, taakkulu 40 procentii imaluunniit 283.500 koruunit Naalakkersuisunit taarsigassarsiaritinneqassapput.

Nr. 2-mut

Suliassat nukissamik sipaarniuteqarfiusut kisiisa eqqarsaatigalugit suliassanut tamarmiusunut taarsigassarsiarititassat annerpaaffissaat, ilanngussaq 1-imi suliassanut ataasiakkaanut ataasiakkaarlutik ataatsimoorlutilluunniit annertussusiliunneqarsimasut aalajangersakkami nassuiarneqarput.

Suliassat ataasiakkaat taarsigassarsiarititallu annerpaaffissaat ilanngussaq 1-imi takuneqarsinnaapput. Ilangussaq 1-imi aningaasartaliunneqartut Naalakkersuisut taarsigassarsiarititassaannut 40 procentiusunut tunngasuupput.

Taarsigassarsisulli aningaasartuutissai taarsigassarsititsiviusinnaasut annerpaamik 350.000 koruuniusinnaapput, taakkulu 40 procentii imaluunniit 140.000 koruunit Naalakkersuisut taarsigassarsiarititassaasa annerpaaffissaraat.

Nr. 3-imut

Suliassat tamarmik ataatsimoortinneqarsinnaanerat aalajangersakkami aalajangersarneqarpoq, tassalu iluarsaassinernut, pitsanngorsaanernut alliliinernulluunniit, aammalu suliassanut nu-

kissamik sipaarniarfiusunut taarsigassarsititsisoqarsinnaavoq. Taamaalilluni nr. 1 aamma 2 ataatsimoortillugit taarsigassarsititsisoqarsinnaavoq.

Tamanna assersuutigalugu iluarsaassinernut, annerpaamik 283.500 koruuninik taarsigassarsititsiviusinnaasunut aammalu ilanngussa 1-imi allassimasumut ataatsimut tamanulluunniit, annerpaamik 140.000 koruuninik taarsigassarsititsiviusinnaasunut taarsigassarsinikkut pisinnaavoq.

Taamaalilluni suliassanut tamarmiusunut taarsigassarsiarititassat annerpaaffissaannik kattussisinnaaneq periarfissinneqarpoq, tassalu inissiami iluarsaassisoqarsinnaavoq pitsanngorsaasoqarsinnaalluniluunniit, imaluunniit alliliisoqarsinnaavoq kiisalu nukissamik sipaarniarfiusunik suliaqartoqarsinnaalluni. Taamatut pisoqassatillugu suliassanut taaneqartunut marluusunut taarsigassarsititsisoqarsinnaavoq. Taamaattorli taarsigassarsiarititassat katillugit 423.000 koruuninik annerpaaffilerneqarput (283.500 koruunit + 140.000 koruunit).

Imm. 2-imut

Imm. 2 Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9, imm. 2 assiguvuq. Aalajangersakkap atuutilerneratigut taarsigassarsiarititassat saniatigut aningaasartuutissat allat tamaasa taarsigassarsisup nammineerluni aningaasalersortussaavai. Taarsigassarsisup aningaasartuutissat sinnerinik qanoq iliorluni aningaasalersuinissaa piumasaqaateqarfigineqanngilaq. Tamanna assersuutigalugu aningaasanngorlugit akiliinikkut, aningaaserivinni taarsigassarsinikkut imaluunniit realkredittimit taarsigassarsinikkut pisinnaavoq.

Imm. 3-imut

§ 10, imm. 1 naapertorlugit taarsigassarsiarititassat erniaqartinneqanngillat akilersugassaanatillu, tamatumani Naalakkersuisut taarsigassarsiarititaasa siunissami piffissami aalajangersimasumi akilersorneqarnissaat siunertarineqanngilaq, soorlu tamanna inissianut nutaanut Naalakkersuisut kommunalbestyrelsillu taarsigassarsiaritaat taamatut ingerlanneqartartut. Taamatuttaaq inissiaq qularnaveeqqusiullugu taarsigassarsiarititassat katillugit aatsaat inissiap niuernerminingata 90 procentia sinnerlugu amerlassuseqanngippata, taarsigassarsiat siulianiittut akilerneqareernerini Naalakkersuisut taarsigassarsiarititaasa akilerneqartussatut inissinneqarsinnaanissaat aalajangersarneqarpoq. Inissiap nalinga sinnerlugu taarsigassarsisoqarsimannginnissaata qulakkeerneqarneratigut Naalakkersuisut taarsigassarsiarititaasa qulakkeerneqarnissaat tamatumani tunngavigineqarpoq.

Imm. 4-imut

Imm. 4-ip najoqqutassatigut annikitsunik allannguuteqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9, imm. 3-p immikkoortuisa aappaat assingaa. Inatsisitigut inissisimaneq maannamut atuuttoq ingerlaannassaaq, taamaalillunilu tunngaviusumik taarsigassarsiat piginnittut nikinneranni akiligassanngortussaapput.

Peqqussutilli oqaasertaani toqqaannartumik allassimavoq, aapparit akornanni piginnittut nikinneranni Naalakkersuisut taarsigassarsiarititassaat akiligassanngortinneqassanngitsut, tamatumani maannamut suleriaasiusimasoq ingerlatiinnarneqarpoq.

Kiisalu taarsigassarsititsisoq aalajangersinnaavoq, taarsigassarsiat piginnittut nikinneranni akiligassanngortussaassanngillat. Tamatumani pingaartumik taarsigassarsisup toqukkut qima-

gunnerani, aammalu taarsigassarsisup aappaata qimagaasup najugaqaannarnissaminik aalajangernerani atorneqarsinnaavoq. Taamatut pisoqartillugu aappariit akornanni piginnittut nikerat toqqaannartumik tassani ilaatinneqanngilaq, aappariit akornanni piginnittut nikerat taamaallaat aappariit inuugallernerannut tunngasuummat.

Imm. 5-imut

Imm. 5-imi inissiami ataatsimi iluarsaassinernut, pitsanngorsaanernut, tassungalu ilanngullugu suliassanut nukissamik sipaarniarfiusunut alliliinernullu, taarsigassarsiat annerpaamik marluusinnaanerat aalajangersarneqarpoq. Tamatumani kingusinnerusukkat piginnittut nikinnissaat apeqqutaatinneqanngilaq. Iluarsaassinernut, pitsanngorsaanernut imaluunniit alliliinernut ataasiinnarmik taarsigassarsititsisoqarsinnaavoq, aammalu suliassanut nukissamik sipaarniarfiusunut ataasiinnarmik taarsigassarsititsisoqarsinnaalluni.

Tassalu iluarsaassinernut, pitsanngorsaanernut, suliassanut nukissamik sipaarniarfiusunut alliliinernullu arlalinnik taarsigassarsititsinissaq periarfissaqartinneqanngilaq. Naalakkersuisut kisimik inissiami iluarsaassinernut annertunerusunut, tassungalu ilanngullugu pitsanngorsaanernut alliliinernullu taarsigassarsititsinnaanissaat aalajangersakkami siunertarineqarpoq. Taamatuttaaq Naalakkersuisut kisimik suliassanut nukissamik sipaarniarfiusunut, ilanngussaq 1-imi piunasaqaatit naammassineqarsimappata taarsigassarsiarititassat annerpaaffissaat tikillugit taarsigassarsititsinnaanerit allassimavoq.

Taamaattumik piginnittup suliassanik sunik inissiami najukkamini suliqartitsiniarluni naliliiffigisariaqarpaa. Inissiamut taarsigassarsiat marluinnaasinnaapput, aappaalu suliassanut nukissamik sipaarniarfiusunut tunngasinnaavoq.

Tassalu Naalakkersuisut piginnittup inissiami aserfallatsaaliuinermit ingerlaavartumut aningaasartuutaanut taarsigassarsititsisarnissaat siunertarineqanngilaq. Aningaasartuutissat taakku piginnittup nammineerluni akilertariaqarpai. Siusinnerusukkat peqqussutip oqaasertaani piginnittup qanoq akulikitsigisumik iluarsaassinernut, pitsanngorsaanernut, tassungalu ilanngullugu suliassanut nukissamik sipaarniarfiusunut aammalu alliliinernut Naalakkersuisunit taarsigassarsinnaanissaa erseqqissumik allassimangilaq, taamaattumillu taarsigassarsititsisarnerup aquneqarnerani tamanna nalornissutigineqarluni. Nalornissuteqarneq iluarsiiiffiniarlugu maanna tamanna peqqussutip oqaasertaani toqqaannartumik erseqqissarneqarpoq.

Imm. 10-imut

§ 14, imm. 1-imi atorunnaarpoq: ”kiisalu qularnaveeqqusiiffigisap nalunaarutaata naeqqaarneranik”.

Qularnaveeqqusiiffigisap nalunaarutaata naeqqaarneranik piunasaqaat peerneqarpoq, pissuseq taanna aningaasalersuinermit ingerlataqarneq pillugu inatsimmi, kunngip peqqussutaatigut nr. 1252, 15. december 2004-imeersukkat atuutilersinneqartumi § 60-imi inatsiseqartinneqarmat.

Qularnaveeqqusiiffigisap nalunaarutaanik piunasaqaammik, assersuutigalugu piginnittut nikeranni imaluunniit sillimasiinermit akiliummut akiitsoqalernerup kingunerisaanik inissiamut sillimasiissut unitsinneqassagualarpat, Naalakkersuisut kommunalbestyrelsillu qularnaveeqqummik piginnittut ilisimatinneqarnerisigut inissiap sukkulluunniit sillimmasersimanissaata qularnaarneqarnissaa siunertarineqarsimavoq.

Nr. 11-imut

§ 15-imi nr. 5 atorunnaarsinneqarpoq, inissiap qimannerani § 10, imm. 1 naapertorlugu taarsigassarsiat akiligassanngortinneqartarnissaat naleqqutinngimmat.

Taarsigassarsiat akiligassanngortinngikkaluarlugit taarsigassarsisup ilinniarnerninut, sulinerminut nakorsanillu katsorsartinnerminut atatillugu inissiamit najukkaminut nuukkallarsinnaanera periarfissinneqartariaqarpoq. Taamaattumik § 15, nr. 5 atorunnaarsinneqarpoq, tamatumalu kingorna taarsigassarsiat piginnittut nikinneranni akilerneqartalertussanngorput, taamaattorli takuuk § 13, imm. 4.

Nr. 12-imut

Aalajangersakkap najoqqutassatigut ataasiakkaatigut allannguuteqartinneqarluni inissianik aningaasalersuisarneq pillugu Inatsisartut peqqussutaanni nr. 1-imi, 7. maj 2007-imeersumi § 18, imm. 1 assigaa.

Naalakkersuisut kommunalbestyrelsillu pisortanit taarsigassarsiat tamarmiusut 0,5 procentiinik suliap suliarineqarneranut akitsuutininik akiliisitsisinnaanerannut inatsisitigut tunngavissamik ikkussisoqarpoq. Taamaattumik inissiamik nutaamik aningaasalersuinissamut taarsigassarsinissamik qinnuteqaatip suliarineqarnerani akitsuut 0,5 procentiusoq annerpaamik (2 x 293.750 koruunit) = 2.937,5 koruuninik annertussuseqassaaq imaluunniit illunut nukissamik sipaarniarfiusunut klasse 1-inut (2 x 322.250 koruunit) 0,5 procentiannik = 3.222,5 kroninik kiisalu illunut nukissamik sipaarniarfiusunut klasse 2-nut (2 x 308.000 koruunit) 0,5 procentiannik = 3.080 koruuninik annerpaamik annertussuseqassalluni.

Iluarsaassinernut, pitsanngorsaanernut, tassungalu ilanngullugu suliassanut nukissamik sipaarniarfiusunut taarsigassarsinissamik qinnuteqaatip suliarineqarneranut akitsuut annerpaamik 283.500 koruunit 0,5 procentiinik annertussuseqassaaq, aammalu ilanngussaq 1 naapertorlugu suliassanut nukissamik sipaarniarfiusunut taarsigassarsiaasinnaasut 0,5 procentiinik annertussuseqassallutik. Suliassanut nukissamik sipaarniarfiusunut taarsigassarsiniarluni qinnuteqaatip suliarineqarneranut akitsuummumut suliassat suut suliarineqassanersut tassungalu taarsigassarsiasat apeqqutaassapput, annerpaamik (1 x 140.000 koruunit) 0,5 procentiannik = 700 koruuninik annerpaamik annertussuseqassallutik. Suliaqarnermut akitsuummumut taarsigassarsiat qinnuteqaatigineqartut suuneri apeqqutaassapput. Suliaqarnermut akitsuutip annertussusissaannut pisortanit taarsigassarsiarititassat inernerisa annertussusaat apeqqutaassapput, tunngaviusumillu suliap suliarineranut aningaasartuutaasunit amerlanerusunut matussutaasinnaallutik.

*§ 2-mut*

Siunnersuutigineqarpoq Inatsisartut peqqussutaat 1. juli 2009 aallarnerfigalugu atuutilissasoq.